

# COLOSENSES

---

## **Marí puráka'aloji Pablo wakára'ari Jesucristo ja'apiyá jema'ajeño, Colosas e i'imakáñojlo i'imaká**

**1** <sup>1</sup>Tupana i'iwapari nu'umaká, nu'umakáloje Jesucristo wakára'akarena riyukuna i'imajé nakiyana. Re kaja maare nujwa'até Timoteo, Jesucristo ja'apiyá jema'ajeri kaja riká. <sup>2</sup>Jesucristo ja'apiyá jema'ajeño, pajimila Colosas e i'imakáñojlo, nuwakára'a marí puráka'aloji. Ra'apiyá jema'ajeño weká ijwa'até, raú wemá wejena, ke panakuwáaka. Nuwata wara'apá Tupana la'aká inaku palá; nuwata kaja rila'aká ipechu palá, ikawíla'ako piyá nakaje nakú.

## **Pablo pura'akó Tupana wa'até Jesucristo ja'apiyá jema'ajeño nakú yukuna marí**

<sup>3</sup>Wawakára'ajeri Jesucristo jara'apá Tupana wa'até wapura'akó kewá, wemaká rijló inaku: “Palá pila'aká weká, nema'akale pa'apiyá”, ke. <sup>4</sup>Noma'á meke ajopana kemaká inaku palá: “Kaphí napechu Jesucristo chojé. Íki'ija kaja nawátaka piyukeja rile'ejena ina'ukena”, ke. Palani wani nojló ilé ke iyukuna jema'akana.

<sup>5</sup>Nakaje, je'echú chu i'imajíkare ijló, nakojé we'epíkana la'arí ipechu kaphí. Tupana i'imataka ina'uké kapichákajo liyá yukuna jema'akana aú iwe'epí rinakojé. <sup>6</sup>Ne'iyajena i'ijnaño Ripuráka'alo ja'apátakana nakú ajopánajlo, ajopánajlo ke, piyuke eja'awá chuwa. Ra'apiyá nema'aká aú, rapiyákaje napechu, ne'emaká piyá pu'uwaré la'akaná nakú. Chuwa, palá nala'aká pekowáaka; palá kaja napechu Tupana nakú. Ikeño'oká ra'apiyá jema'akana i'imaká wakajé, eyá maárejecha, palani ijló kewákaje puráka'aloji ja'apiyá i'imakana. <sup>7</sup>Júpimi Epafras, íki'ija wawátakare, jewíña'atari i'imaká rinaku. Wajwa'até ri'imá Tupana puráka'alo yukuna ja'apátakana nakú; Jesucristo wa'até jápajeri ke riká apumí chojé. <sup>8</sup>Riká kemari wajló inaku i'imaká, meke íki'ika iwátaka pekowáaka Tupana Pechu palamane aú.

<sup>9</sup>Ri'imaká wajló riyukuna wakajé, eyá maárejecha, unká wayurila Tupana wa'até pura'akano inaku. Wemá rijló, ra'akáloje ijló we'epíkaje, iwe'epíkaloje riwátaka ke la'akana nakojé raú. <sup>10</sup>We'epíkaje, Tupana a'akare ijló, aú palá i'imajika pajwa'atéchaka, ripechu nakú ri'imaká ke. Raú kaja ila'ajé palá riwátaka ke. Wa'até richaje, richaje ke, iwe'epíjika rinakojé. <sup>11</sup>Piyukeja Tupana we'epika nakaje la'akana; riwe'epí kaja ipechu la'akana kaphí, ijña'akáloje ke'iyapejé chapú kaje yajwé panaku. Raú ipechu pu'ují, chapú kaje yajwé amaka e'iyonaja, unká kaja ipechu la'alajo ujwí riliyá. <sup>12</sup>Ipura'ajiko riká wara'apá wa'até kewá, imá rijló: “Palá pila'aká weká, nakaje yurí kole pile'ejena ina'ukénajlo je'echú chu Jesucristo palamane aú”. <sup>13</sup>Kalajeruni chu i'imakaño ke we'emaká; Tupana kalé i'imatari we'emaká richiyá. Jiñá Chi'inárikana kápiya ri'imatá weká, ra'apátakaloje weká Ri'irí kápeje penaje. Raú Ri'irí, íki'ija riwátakare, yuriro wawakára'ajeri penaje. <sup>14</sup>Riká taka'arí wachaya i'imaká, raú we'emakóloje pu'uwaré wala'akare liyá penaje, raú kaja ramó ra'apiyá jema'ajeño chaje.

### **Jesucristo pala'ataka ina'uké pechu yukuna marí**

<sup>15</sup>Unká iná amálare Tupana. Ripechu ke kaja Ri'irí pechu, riká kalé namá i'imaká. Piyukeja Tupana keño'ótakarena i'imaká chaje Ri'irí. Unká chiyó na i'imá, kaja re Ri'irí Jesucristo i'imaké. <sup>16</sup>Riká keño'ótari piyukeja nakaje eja'awá chu i'imakare, je'echú chu i'imakare wa'ató. Piyukeja nakaje iná amákare, eyá nakaje unká iná amálare kaje wa'ató, rikeño'ota kaja i'imaká. Tupana awa'á i'imakaño, eyá yenuwa i'imakaño, nawakára'ajeño, kajena wa'ató, rikeño'ota i'imaká. Rijluwa penaje rikeño'ota piyukeja nakaje i'imaká. <sup>17</sup>Unká chiyó piyukeja nakaje i'imá, kaja Jesucristo i'imaké. Ripechu nakú nakaje i'imaká, ke piyukeja nakaje me'etení. <sup>18</sup>Iná wíla'aru i'imaká iná napónajlo, ke kaja Jesucristo ra'apiyá jema'ajéñojlo, nawakára'ajeri wani ri'imakale. Ra'á kajmuchaji ra'apiyá jema'ajéñojlo, ne'emakáloje matajnako rijwa'até je'echú chu. Riká makápo'oro paineko piyuke, kaja júpimi ke taka'akaño i'imaká tukumá, ri'imakáloje piyuke ajopana chaje penaje. <sup>19</sup>Tupana pechu ke kaja Jesucristo pechu; kaja keja Tupana wátaka ri'imaká. <sup>20</sup>Riwata piyuke nakaje je'echú chu i'imakare, eja'awá chu i'imakare wa'até, lamá'atakana palá. A'awaná apiyákanami nakojé Jesucristo taka'arí ina'uké chaya penaje i'imaká; ripalamane Tupana pala'atárijla ina'uké pechu pajwa'atéchaka rijluwa.

<sup>21</sup>Iká, unká Tupana wa'atéjena kalé i'imaká júpimi; ripinana ke i'imajika, raú ila'aké pu'uaré ipechu keja. Raú ila'aké ikó chapú péchuruna ke rijló. <sup>22</sup>Kajrú Jesucristo ña'aká chapú kaje yajwé panaku i'imaká. Ritaka'aká ichaya i'imaká, i'imakáloje rile'ejena ina'ukena penaje. Ñakele chuwa, palá péchuruna ke iká Tupánajlo. Raú unká na ila'akare pachá kalé rimaje inaku: “Pu'uaré la'ajeño neká nojló”, ke. <sup>23</sup>Ilé ke iká chuwaka rijló, kaphí péchuruna i'imakale Jesucristo chojé, Ripuráka'alo chojé wa'até. Raú chuwa, ila'á richaje ipéchuwa kaphí Tupana puráka'alo ja'apiyá i'imakana aú. Kaja jema'á ri'imataka iná kapichákajo liyá yukuna, raú iwe'epí meke palá wani nakaje i'imajika ijló. Iyuríniña Ripuráka'alo, na'apatakare ijló i'imaká, ja'apiyá i'imakana. Riyukuna na'apata ajopánajlo, ajopánajlo ke, piyuke eja'awá chuwa i'imaká; nuká i'imari kaja riyukuna ajopánajlo.

<sup>24</sup>No'opatakale riyukuna ajopánajlo, jimaje ne'iyajena la'año nuká chapú, e'iyonaja pu'ují nupechu, nomákale chapú yajwé, Jesucristo amaka riká i'imaká ke. Kaja keja nu'umajika chapú kaje yajwé ña'akana nakú, richaje, richaje ke, ipechu i'imakáloje kaphí Jesucristo chojé. <sup>25</sup>Tupana a'arí nuká ra'apiyá jema'ajeño ñathé a'ajerí, ri'imakáloje palani ijló penaje. Apú ewá, apú ewá ke, nu'umaká piyukeja riyukuna ajopánajlo. <sup>26</sup>Júpimi unká ina'uké we'epike Jesucristo yukuna, me'echú ke ri'imajíkale naliyá riwakajé i'imaká. Eyá chuwa, pu'uwaká riyukuna rile'ejena ina'ukénajlo. <sup>27</sup>Piyukeja ina'ukénajlo penaje riyukuna, ne'emakáloje rile'ejena ina'ukena ra'apiyá jema'akana aú. Piyukeja Ripechu i'imakárena e'iyá, rile'ejena waja neká. Neká i'imajeño palá wani je'echú chu, kaphí richojé péchuruna ne'emakale.

<sup>28</sup>Jesucristo yukuna i'imakana nakuja nuká, ajopana wa'até. Riyukuna aú wala'á piyuke ina'uké jenakú. We'epíkaje, Tupana a'akare wajló aú wewíña'ata neká, nawe'epíkaloje rinakojé palá, napechu i'imakáloje Jesucristo pechu ke kaja. <sup>29</sup>Ilé ke ina'uké pechu i'imakáloje penaje nujapa kajrú wani najwa'até. Kajrú wani Jesucristo a'aká nuñathé, rilokópa'alaja nula'á nakaje.

**2** <sup>1</sup>Nuwata iwe'epika meke íki'ika no'oká nunakojó iká, Laodicea e i'imakaño, ajopana wa'até, unká jo'ó amálare nuká. <sup>2</sup>No'ó nunakojó iká, ipechu i'imakáloje kaphí Jesucristo chojé ñakeja, ipechu i'imaká piyá ujwí rinaku, ipechu i'imakáloje pajluwaja chuwa íki'ija pekowáaka wátakana nakú. Nuwata kaja iwe'epika mékeka rila'aká iná palá wani nakojé. Júpimi me'echuje ke riyukuna i'imajika ina'uké liyá i'imaká. Chuwa unká ñaké kalé

riká, wawe'epíkale palá rinakojé. <sup>3</sup>Kajrú péchuri Tupana; piyukeja riwe'epika nakaje nakojé. Me'echuje kaja ina'ukejlo nakaje riwe'epíkare la'akana nakojé. Jesucristo ja'apiyá jema'akana aú ja kalé iná we'epí mékeka inajlo riká. <sup>4</sup>Riyukuna nu'umá ijló, ajopana pajlaka piyá ijwa'até. “Kewaka japi riká”, keja napajlaka iná wa'até mapeja. <sup>5</sup>Unká nu'umalá ijwa'até me'etení, e'iyonaja re nupechu ijwa'até. Pu'ují kaja nupechu inaku, i'imakale palá pajwa'atéchaka ilérowa; unká kaja iyurílale kaphí Jesucristo chojé i'imakana iliyó.

<sup>6</sup>Kaja iwata Jesucristo i'imaká iwakára'ajeri, ñakele chuwa ila'á rilokópa'ala palá. <sup>7</sup>Ra'apare palamane a'awaná tára'o kamachá. Ñaké kaja ijló kaphí Tupana chojé i'imakana, nowíña'atakare nakú i'imaká. Iyuríniña kaja palá rila'akare iká yukuna i'imakana rijló.

### **Wajé iná pechu Jesucristo pechu chuwa i'imakana aú. Riyukuna marí.**

<sup>8</sup>Amá ikó pajlákachina liyá, napichátaka piyá ipechu kewákaje puráka'aloji liyá. Napechu keja nemaká nakaje nakú, unká kewaka kalé nakaje ne'emakare yukuna. Nachi'iná michuna puráka'alomi kaje nakuja napura'ó; eyá eja'awá minaná kaje nakú napura'ó kaja. Unká Jesucristo puráka'alo ke kalé riká, nakaje nemakare nakú.

<sup>9</sup>Unká naje kalé jema'á na'apiyá ilé kaje, marí ke ri'imakale: Tupana pechu ke kaja Jesucristo pechu. Eja'awá chu ri'imaká wakajé, re rinapona i'imá, ina'uké napona ke kaja. <sup>10</sup>Pajluwaja japi keja weká Jesucristo wa'até, raú richojeja kalé iná i'imá palá. Riká chá'atari piyukeja jiñana wakára'ajeño. <sup>11</sup>Tupana wa'atéjena iká, Jesucristo i'imaká ke i'imakana aú. Ne'iyajena kemaño nanakuwá: “Tupana wa'atéjena weká, mata'akeja chinúmaruna we'emakale”, ke. E'iyonaja unká ñaké kalé riká inajlo. Jesucristo ja kalé i'imatari iná pu'uaré la'akaná liyá. Richá'atakale ijló nakaje, ila'ajíkare pu'uaré ipechu keja aú, ra'á iká rijwa'atéjenawa penaje. <sup>12</sup>Marí ke kemakánaka nala'aká wakajé bautizar Jesucristo ja'apiyá jema'ajeno: Jesucristo taka'aká wachaya i'imaká wakajé, ritaka'á wapumí chojé, pu'uaré wala'akare pachá. Riká jenami nala'á najmurátaka iná junápeje ee. Rijwa'até ke kaja wamakápo'oko, we'emakáloje wajé i'imakaje ja'apiyá ripalamane, wapechu i'imakale kaphí Tupana chojé. Makápo'okajo jenami ke kaja wala'aká wajmuraka ejomi, wácho'oko junápiya ee. <sup>13</sup>Júpimi kapichájeño penájena i'imaká Tupana liyá, pu'uaré ila'ajíkale i'imajika, unká kaja rila'ejena ina'ukena nakiyana kalé i'imajíkale. Riwakajé unká iyurike iliyó ipechu keja nakaje la'akana; eyá

chuwa, Jesucristo ja'apiyá jema'ajeño i'imakale, Tupana a'arí ijiló kajmuchaji, i'imakáloje matajnako je'echú chu rijwa'até raú. Ramó kaja ichaje piyukeja nakaje ila'akare pu'umaré i'imaká liyá. <sup>14</sup>Tupana puráka'alo lana'akéjami nakojé we'epíkana aú, wawe'epí pu'umaré la'ajeño we'emaká, unká pachá wala'alá rimaká ke. Pachá riwajájkarena penájena nakiyana we'emaká. A'awaná apiyákanami nakojé Jesucristo taka'arí wachaya i'imaká, raú ri'imatákalaje weká ilé kaje chiyá. <sup>15</sup>Jesucristo taka'akale wachaya i'imaká aú, richá'ata Jiñá Chi'inárikana, raú richá'ata kaja ra'apiyá wakára'ajeño, jiñana pechu. Riwata piyukeja jema'aká richá'ataka neká yukuna.

<sup>16</sup>Ne'iyajena kemaño a'ajnejí nakiyana nakú: “Unká ajñakaje penaje kalé riká”, ke. I'irakaje nakiyana nakú nemá kaja: “Unká i'irakaje penaje kalé riká”. Unkale napechu ke kalé ipechu i'imakale rinaku aú, nemá inaku: “Pu'umaré la'ajeño neká”, ke, ila'akale apo'ojó napechu nakú ri'imaká ke. Nemá kaja inaku: “Pu'umaré nala'aká, unkale nephala fiesta wakajé ja'apí, nale'ejé watána'akaje jená wakajé ja'apí wa'ató”. A'aniña inakojó napuráka'alo. <sup>17</sup>Kaja Jesucristo iphá majó i'imaká, ñakele chuwa pu'uwaká wajló naka la'akana palani. <sup>18</sup>Pu'ují ne'iyajena pechu Tupana wa'atéjena, je'echú chiyájena, nakú, raú nephá wani na'apí. Nemá nanakuwá: “Watapú wamá nakaje ya'atakó wajló”, ke, raú nala'á nekó we'epiño ke wani. Nemájika ee inaku: “Pu'umaré la'ajeño neká”, ke, unkale ipechu i'imalá napechu ke, a'aniña inakojó napuráka'alo. <sup>19</sup>Neká, numakárena nakú, yuriño naliyó Jesucristo ja'apiyá jema'akana. Iná wíla'aru i'imaká iná napónajlo, ke kaja Jesucristo ra'apiyá jema'ajeñojlo. Wawakára'ajeri wani riká, la'arí piyukeja rijwa'atéjena nakú palá, pajluwano, pajluwano ke. Raú nawe'epí richaje, richaje ke nakaje Tupana wátakare la'akana nakojé. Piyukeja inakiyana i'imaño pajluwa japi keja pajwa'atéchaka. Ewá, ewá ke, rijwa'atéjena la'aká palá, Tupana wátaka ke Jesucristo palamane aú.

<sup>20</sup>Júpimi ila'aké mapeja nakaje ajopana wakára'ajika iká ke. Eyá chuwa, kaja taka'akaño japi ke iká ilé kaje la'akanajlo, Jesucristo wa'atéjena i'imakale. Ñakele chuwa unká na penaje ila'alá mapeja nakaje nawakára'akare ila'aká. <sup>21</sup>Nakaje nakiyana nakú nemá: “Pijápaniña rinaku”, ke; eyá a'ajnejí nakiyana nakú nemá kaja: “Pajñániña riká”, ke; nakaje nakiyana nakú nemá kaje: “Pijña'aniña pikápojo riká”, ke. Ilé ke nawakára'ajika ila'aká najwa'até i'imaká. <sup>22</sup>Unká na penaje kalé nakaje nemakare nakú, kapichákajo penaje ri'imakale. <sup>23</sup>Apala ne'iyajena pechu nakaje

newiña'atakare neká nakú: “Kapechúrúnajlo napuráka'alo”, ke. Ilé ke napechu rinaku, nawakára'akale nala'aká nakaje nach'i'nárikanajlo penaje. Mapeja nala'aká nanakuwá ajopana ja'apejena ke. Kewí nala'aká nanapona, e'iyonaja unká na penaje kalé najló riká, nala'akale napechu keja pu'uaré.

**3** <sup>1</sup> Jesucristo wa'até makápo'okaño pajñakani ke iká me'etení. Ilé ke ri'imakale ijló, iwata ijluwa nakaje je'echú chu i'imakare. Tupana awa'á Jesucristo; rijwa'até riwakára'a rile'ejena ina'ukena. <sup>2</sup> Ijna'atá ipéchuwa nakaje je'echú chu i'imakare nakú; i'ijnatániña ipéchuwa nakaje marí eja'awá chu i'imakare nakú. <sup>3</sup> Kaja taka'akaño japi ke iká me'etení pu'uaré la'akanajlo, Jesucristo wa'até i'imakana aú. Ñaké Tupana wátaka ri'imaká ijló. <sup>4</sup> Re waje i'imakaje ijló Jesucristo palamane. Riphájika majó kajrú mejáma'atani wa'até wakajé, riwá'aje iká rijwa'ató, i'imakáloje rijwa'até ñakeja.

### **Jesucristo wa'até iná la'á palá. Riyukuna marí**

<sup>5</sup> Ila'aniña nakaje unká Tupana wátalare ila'aká; ila'aniña kaja imanáicho ajopana wa'até; ila'aniña kaja ikó mawó nakaje, unká Tupana wátalare ila'aká, nakojé. I'imaniña kaja kayukújne'ekena. Neká pechu pu'ují nakaje marí eja'awá chu i'imakare nakú, lanakiya unká na'alá nanakojó Tupana. <sup>6</sup> Kajrú Tupana wájajika ilé ke la'akaño pu'uaré, unká pachá nema'alá ra'apiyá. <sup>7</sup> Ñaké kaja ila'ajika pu'uaré júpimi i'imajika. <sup>8</sup> Chuwa, kaja iyurí iliyó ñaké la'akana. Iyurí iliyó iyuchá; ipechu i'imaniña chapú ajopana nakú; ila'aniña kaja ajopana ina'ukena unká ina'ukélaruna ke ijluwa; ipura'aniño kaja pu'uwareni puráka'aloji aú; <sup>9</sup> ipajlániña kaja pajwa'atéchaka. Kaja iyurí iliyó pu'uaré ila'ajíkareno la'akana. <sup>10</sup> Waje ke Tupana la'aká wapechu, wala'akáloje palá riwátaka ke, wawe'epíkalaje palá rinakojé raú. <sup>11</sup> Ke'iyapejena ina'uké paliyáaka: re judíona i'imakaño; re kaja ajopana, unká judíona kalé i'imakaño; re kaja tapuwíyana; re kaja mawemíwaka jápaka apujlo; re kaja najlúwaja jápakaño. Chuwa Jesucristo ja'apiyá i'imakana aú, unká ajopana, ajopana ke, kalé weká paliyáaka, Ripechu i'imakale ra'apiyá jema'ajeño e'iyá. Ilé kaje la'arí weká pajluwaja yaní keja pajwa'atéchaka.

<sup>12</sup> Íki'ija wani Tupana wátakarena iká; ri'iwapakárena kaja rijluwa iká, i'imakáloje rile'ejena ina'ukena penaje. Ñaké i'imakale, iwe'epí pamu'ujíchaka. I'imá ina'uké wani pajwa'atéchaka; ila'aniña kaja inakuwá nakaje nakojé we'epéjeño ke wani; ila'aniña ikó tu'ujné nakaje nakú; iyúcha'aniño kaja kiñaja; <sup>13</sup> a'á

kaja pañathéchaka. Inakiyana ka'ajná akha'año ne'iyajena maná, nala'akale iká chapú. Amó nachaje, Jesucristo amako ichaje i'imaká ke kaja. <sup>14</sup> Apú nakaje ila'akare chaje nuwata iwátaka íki'ija pekowáaka; rejéchami kaja unká na i'imalaje ijló, unká ila'alare palá.

<sup>15</sup> Jesucristo la'arí wapechu palá, ripalamane we'emakáloje pajluwaja yaní japi keja pajwa'atéchaka. Ñakele i'imá palá rila'akare iká yukuna rijló. <sup>16</sup> A'á kaja Jesucristo puráka'alo inakojó ñakeja, ila'akáloje rimaká ke penaje. Ila'á kaja penakúchaka raú. Iwe'epí ripuráka'alo nakojé palá, jewíña'atakaloje palá pekowáaka rinaku. Jataní kaja Tupana yale pajwa'atéchaka. Iwajá ipéchuwa palá rila'akare iká nakojé. <sup>17</sup> Piyukeja nakaje ila'akare, ila'á riká Jesucristo apumí chojé ke. Piyukeja nakaje imakare nakú, imá kaja rinaku rapumí chojé ke, ripalamane i'imakale. Imá kaja Tupánajlo: “Wara'apá, palá pila'aká weká”, ke.

### **Jesucristo wa'atéjena i'imakáloje palá nañakaré chiyájena wa'até penaje yukuna marí**

<sup>18</sup> Kalúyuna inaánajlo numá: Jema'á iluna ja'apiyá palá, ilé ke Jesucristo wátakale ra'apiyá jema'ajeño la'aká. <sup>19</sup> Kalúyuna achiñánajlo numá: Iwata íki'ija iluna; i'imaniña yuriná najwa'até.

<sup>20</sup> Iyánijlo numá: Jema'á ichi'iná ja'apiyá palá, ñaké la'akana i'imakale palani Tupánajlo. <sup>21</sup> Iká, nachi'inajlo numá: Iyúcha'ataniña iyani, napechu la'akó piyá ujwí iliyá.

<sup>22</sup> Ajopana wa'até jápajeñojlo numá: Jema'á palá iwakára'ajeño ja'apiyá. Nematiká ijló nakaje la'akana nakú, keja ila'á riká piyukeja. Apala ila'á palá nejlú chu i'imaká ketánaja kalé, napechu i'imakáloje palá inaku raú. Ila'á kaja riká palá, ikoja i'imajika ee; ila'á nakaje najló palá, iwe'epika rila'akana lokópa'alaja, iphákale Tupana ja'apí. <sup>23</sup> Piyuke nakaje ila'akare, ila'á riká wechi, Jesucristo wa'até jápajeño i'imakale. Ñakele rijló japi ila'á nakaje, keja ila'á ijápaka'ala ajopánajlo. <sup>24</sup> Iwe'epí iwakára'ajeri Jesucristo a'ajika ijló palá ila'akare wemí, je'echú chu i'imajika rijwa'até wakajé, rijwa'até jápajeño ke i'imakale. <sup>25</sup> Eyá pu'uwaré la'ajérijlo ra'ajé kaja, pu'uwaré rila'aká lokópa'ala, riwemí.

**4** <sup>1</sup> Najwa'até jápajeño kariwátenajlo numá: Ila'á palá ijwa'até jápajeño nakú. A'á palá najló najápaka'ala wemí, jata'aniña neká. Iwe'epí re kaja iminá je'echú chu.

<sup>2</sup> Piyuke Jesucristo ja'apiyá jema'ajéñojlo numá: Iyuríniña Tupana wa'até pura'akano iliyó; i'imá kapechúruna rijwa'até pura'akano aú; i'imá kaja palá rila'akare iká yukuna rijló. <sup>3</sup> I pura'ó


kaja rijwa'até nunaku, wawakára'ajeri Jesucristo a'akáloje nuñathé, nu'umakáloje riyukuna kajrú ajopánajlo, ajopánajlo ke, penaje. Ina'uké wajákelana chu nuká me'etení, nu'umakale Jesucristo yukuna chona. Me'echuje ke riyukuna i'imaká júpimi i'imaká. <sup>4</sup>Nakele ipura'ó nunaku Tupana wa'até, nu'umakáloje riyukuna palá najló, ri'imaká piyá me'echú najló.

<sup>5</sup>I'majika ee unká jema'alaño Tupana ja'apiyá wa'até, i'imá kapechú najwa'até. I'imá najló Tupana yukuna, ipechu i'imaniña nanaku: “Rejómiko we'emá najló riyukuna”, ke. <sup>6</sup>Ipura'ó palá najwa'até; iwe'epí kaja najló a'ajipakana palá, nakaje yukuna nakejá'ajika iliyá kewá.

### **Kaja penaje rimakare nakú najló marí**

<sup>7</sup>Re wejena nakiyana Tíquico nujwa'até maare, íki'ija nuwátakare riká. Palá kaja ra'aká nuñathé Tupana jápaka'ala la'akana aú. Jesucristo wa'até jápajeri riká nujwa'até, riká kemájeri ijlo nunaku mékeka nuká maárowa. <sup>8</sup>Ñakele nuwakára'aje riká ichaje, ri'imakáloje ijlo mékeka weká maare yukuna, rika'akáloje ujwí kaje iliyá raú. <sup>9</sup>Onésimo, íki'ija wawátakare, Jesucristo ja'apiyá jema'ajeri kaja riká. Neká iyamá i'ijnajeño mékeka weká maare yukuna i'imajé ijlo.

<sup>10</sup>Re nujwáke'ewe Aristarco maare ina'uké wajákelana chu nujwa'até. Riká kemari inaku: “Eko palá najló ka'ajno”, ke. Ñaké kaja Marcos, Bernabé e'ewé, kemaká inaku. Kaja numá





ijló, riphájika penaje, palá i'imajika rijwa'até. <sup>11</sup>“Eko palá najló ka'ajno”, ke Justo kemaká inaku. Aristarco, Marcos, Justo, kele judíona nakiyana neká, Jesucristo ja'apiyá jema'ajeño kaja neká. Nekaja kalé a'año nuñathé Tupana yukuna ja'apátakana aú ajopánajlo, ajopánajlo ke, ne'emakáloje rijwa'atéjena ra'apiyá jema'akana aú. Napalamane kalé palá nupechu. <sup>12</sup>“Eko palá najló ka'ajno”, ke Epafras kemaká inaku. Inakiyana riká, Jesucristo wa'até jápajeri kaja riká. Kajrú ripura'akó Tupana wa'até inaku; mawó rikejá'aka nakaje Tupana liyá ijloje penaje. Ripura'ó kaja rijwa'até inaku, ra'akáloje ináthé kaphí péchuruna i'imakáloje penaje, iwe'epíkaloje kaja palá itukumó, riwátaka ke la'akana. <sup>13</sup>Nuká amari Epafras maare, raú nuwe'epí kajrú ri'ijnataka ripéchuwa inaku. Naké kaja ripechu nakú Laodicea eyájena, Hierápolis eyájena wa'até. <sup>14</sup>Pujána'ajeri Lucas, íki'ija wawátakare, kemari kaja inaku: “Eko palá najló ka'ajno”, ke. Ñaké kaja Demas kemaká inaku.

<sup>15</sup>Eko palá Jesucristo ja'apiyá jema'ajeño Laodicea e i'imakáñojlo. Eko palá kaja Nínfajlo, ruñakaré chojé awakájeñojlo wa'até. <sup>16</sup>Ipura'ajiko marí papera kaje wa'até re awakáñojlo ejomi, eko iwakára'a riká Laodicea ejo, Jesucristo ja'apiyá jema'ajeño, re i'imakaño pura'akóloje rijwa'até penaje. Nuwakára'a kaja najló papera kaje i'imaká; nawakára'aje kaja ijlo riká rilanakiya. Eko ipura'ó rijwa'até. <sup>17</sup>Eko imá Arquípojlo: “Wawakára'ajeri Jesucristo apumí chojé ke numaká rijló: Piñapata ilé jápakaje la'akana nuyuríkare pijló”.

<sup>18</sup>Nuká Pablo lana'arí ijlo nuyáthe'ela aú marí nokó: “Eko palá ijlo ka'ajno. Ina'uké wajákelana chu nuká me'etení. Nuwata Tupana la'aká iká palá ripalamane”, ke nulana'aká ijlo.

Kaja.